



Mii berre leat mielde protokollas/prošeaktačilgehusas go ozat ruđa SÁNAG' DjO-foanddas?

Ođasmahttojuvvon borgemánu 17. beaivvi 2011

Láidehus

Protokolla/prošeaktačilgehus galgá čájehit ohcamuša meannudeddjiide, maid ohcci áigu dutkat, manin aiddo dat fágalaščuolbma lea mávssolaš ja mo ohcci áigu gávnnahit vástádusa čulbmii.

Ii leat dušše okta rievttis vuohki čállit protokolla/prošeaktačilgehusa. Hábmemii ja detálljaid dárkilvuhtii váikkuha earret eará prošeavtta viidodat ja makkár prošeavttas lea sáhka. Dihto dieđut galget dattetge álo leat mielde, vai DjO-stivra sáhtta árvvoštallat ollašuvvetgo relevánssa, kvalitehta, prošeaktastivrema ja čađahahttivuođa gáibádušat.

Dan lassin, ahte protokolla/prošeaktačilgehusa vuođul ohcet ruđaid ja dohkkeheamiid, de galgá prošeaktačilgehusa sáhttit geavahit reaidun prošeavtta čađaheami oktavuodas.

Lea mearriduvvon, ahte SÁNAG' DjO-stivrii sáddejuvvon ohcamušaid protokolla/prošeaktačilgehus lea 4 000 sáni biddjon dat bajimus mearri oktan referánsalisttuin.

Ohcamušat, mat eai deavdde mearriduvvon eavttuid, eai meannuduvvo.



Namma

Lea mávssolaš fuomášit buori prošeaktanamahusa/bargonamahusa, mii bures govvida prošeavtta.



Fágalaščuolbma

Doarjaga ohcan DjO-foanddas eaktuda, ahte prošeavtta olis lasihit máhtu psykalaš dearvašvuođasuddjema ja gárrendilledivššu surggiin Norgga olles sámi álbmoga hárrái, ja ovddidit vejolaš ángiruššansurggiid, mat bohtet ovdan ovttaskas almmuheamis.

Jos ohccis ii leat gárvves/lohppii smihttojuvvon prošeaktajurdda, de son sáhtta ohcat ruđaid prošeaktaovddideapmái. Prošeaktaovddidanruđaide lea ráhkaduvvon erenoamáš njuolggadusat.



Máhttostáhtus/girjjálašvuohta/referánssat

Ohcci ferte čujuhit referánssaide, mat čájehit makkár dieđut/dutkan dan fáttá birra lea, masa son ohcá ruđaid. Son ferte nappo čujuhit relevánta referánssaide.



Fágalaš kvalitehta

Dát oassi protokollas/prošeaktačilgehusas galgá čájehit mo ohccit leat jurddašan gávnnahit vástádusa fágalaščulbmii. Dan oktavuodas galgá ákkastallat mo dutkančuolmma vuođul válljejuvvo teorehtalaš lahknanvuohki, fágalaš metodat ja dutkanviidodat. Jos áigu geavahit informánttaid, de ferte prošeaktačilgehus govvidit mo daid áigu háhkat, ja makkár eavttuid vuođul informánttat galget válljejuvvot ja hilgojuvvot (inklušuvdna- ja eksklušuvdnakriterat). Reive, mainna bovdejit informánttaid searvat dutkamii, galgá biddjojuvvot mielddusin.



Dohkkeheamit

Jos prošeakta eaktuda REK' dahje eará instánssaid dohkkeheami, de ferte ohcci dokumenteret, ahte son lea ohcan relevánta instánssain dárbbášlaš dohkkeheamiid ovdal go son lea sádden ohcamuša DjO-fondii. Mii fuopmášahttit, ahte DjO-foandda ruđat eai máksojuvvo ovdal go loahpalaš dohkkeheapmi lea addojuvvon (dalle go dat lea

vealtameahttun). Jos ohcci oaivvilda, ahte prošeakta ii eaktut dohkkehemiid, de son ferte vuođuštit dan.



Čađahanplána

Prošeavtta čađaheapmái ferte leat ráhkaduvvon plána, mii čájeha ahte dan lea realisttalaš ja vejolaš čađahit dasa rehkenastojuvvon resurssaiguin (áigerámma, áigegeavaheapmi, ekonomijja, bargit ja gealbu).



Etihkalaš árvvoštallamat

Ohcci galgá árvvoštallat prošeavtta etihkalaš beliid. Vurdojuvvo, ahte dutkan/ovdánahttinbargu sámi álbmoga ektui árvvoštallojuvvo erenoamážit.



Bohtosiid gaskkusteapmi

Ohcci ferte ovddidit plána, mii čájeha mo son áigu gaskkustit prošeavtta bohtosiid jogo čálalaččat dahje njálmmálaččat; dieđalaš/populáradieđalaš artihkkaliin, raporttain, logaldallamiin jna. Geat gullet almmustahttimiid ulbmiljovkui?



Prošeavtta organiseren

Dearvvašvuođadutkama lánka bidjá gáibádusaid dearvvašvuođafágalaš dutkama organiseremii. Protokollas/prošeaktačilgehusas galgá danin bohtit ovdan mo dutkan organiserejuvvo, prošeaktajođiheaddji, prošeaktabargi(id) ja bagadeaddji(id) namat ja sin gealbu suorggis.

Galgá maid čilget mo dieđuid áigu rádjat.



Relevánsa kultuvrralaš oaidninsajis

Ohcamušas galgá govvidit makkár ávkeárvu prošeavttas lea sámi álbmoga psykalaš dearvvašvuođasuddjemii.



Golut

Prošektii galgá ráhkadit dárkilis bušehta. Juolluduvvon ruđaid galgá geavahit ráhkaduvvon bušehta mielde. Jos lea vuostáiváldán dahje ohcan ruđa eará gálduin, de ferte dan almmuhit.



Mildosat

Miiddusin ferte bidjat CV/duođaštusaid, mat dokumenterejit prošeaktabargiid ja vejolaš bagadeddjiiid dárbbalaš gealbbu, ja vejolaš almmustahttinlisttu. Miiddusin galgá maid bidjat prošeavtta oasálaččaid ja earáid ovttasbargosoahpamušaid ja dárbbalaš lobiid.

Deanus, čakčamánu 4. b. 2014

Grete Tørres

Grete.Torres@finnmarkssykehuset.no

DjO-konsuleanta

Sámi našuvnnalaš gealboguovddáš – psykalaš dearvvašvuođasuddjen ja gárrendilledikšu